



Fasnacht 2007

J.B.-CLIQUE SANTIANS
Stammgesellschaft

Hei nuun* uff dr Gass

*baseldytsch fir „High Noon“

Dr Wildi Weschte isch im Kino
beschti Underhaltig wenn dr Lino
Ventura und dr Gärri Cooper
sich verhaue: Dasch doch super!
Nohäär geen si ain go bloose
im Saluun RieseKrawall - dänn knallt e Pischtole
ain macht in d Hoose
dr Weschte isch nit fir Mimoose
maischtens goot das rasend schnäll
ab uff d Gass – s git ä Duäll
si stöön sich vis-à-vis, dr Guet und dr Schlächt
d Filmmuusig wird ärschd – jetzt goots ums Rächt
dänn schiesse si baidi zer glyyche Zyt
will s esoo mee Spannig git
dr Schlächt ligt im Staub und hätts verspyylt
dr Gueti hätt schynts besser zyyt.
S näggschti Bild das isch saggstargg
der Zimmermaa nimmt Mass fyr dr Saarg
und dr Dootegräber ooni z juufle
butzt by dr Friedhofsmuure d Schuufle.
Und ganz am Schluss, er hätt jo gwunne
ryttet dr Gueti ab in d Oobesunne.
Das isch – in kurzer Form beschryybe –
s JB-Süschee zwaidausigundsiiibe.

Wenn jetzt ain kunnt und sait
dasch nit glatt – mir lääbe innere friidlige Stadt
dä laade mir yy, dasch doch famoos
fir e Bsuech an dr Klybeck- oder Fäldbärgstroos:
Hett ain bim Wette verloore oder aifach e Wuet
e Schuss uf dr Geegner duet immer guet!
Luegsch aim grad in d Auge isch das naime duure
scho-n-e brächtige Grund fir ä Fuscht uff d Schnuure.
Au de Autifaarer fäält mänggmool ganz
jedi Spuur vo Doleranz:
Duesch aimol zvyyl brämse oder gisch zweenig Gas
dä hinde verstoot iberhaupt kai Spass.
Är ziet ä Revolver und balleret loos –
jä so isch das hitte uff dr Stroos.

Fir ä FCB Fään vo dr erschte Stund
gits jo iberhaupt kai Grund
zäm ane Mätsch ins Stadioon z stoo
will, z Baasel isch das nämlich soo:
solang mir gwinne ischs kai Sach
doch wänn mir verliere – dänn gits Grach
bluetigi Naase, gwschulleni Kepf
was sinn das doch fir armi Drepf!
Doch s beschti kunnt no – und das scheniert
kaim ainzige Schleegeer isch eppis bassiert
die Verantwortlige kenne schynts ruehig schloofe
und mir warte uff die neggschti Kataschtroofe.

Nonem erschte Auguscht do wird's bekannt
wyyt umme im ganze Schwiizerland
z Baasel isch d Hell loos – d Schugger findes nimme glatt
si sinn underwäggs in dr ganze Stadt
und dängge bi sich – äs wär dochs beschte
mir kennte so schaffe wie friener im Weschte.
S Gfiel im Buuch wird immer ärger
rächt griegt am Endi nur dr Stärigger!

Dass das an dr Fasnacht nit bassiert
isch unsere Zuug so uffmarschieret
Kauboys und Scheriffs sorge fir Ornig im Rummel
s isch schliesslig Fasnacht und nonig Bummel
und wennis ain nit begriffet – mit däm göhn mir denn schnäll
ab uff d Gass – fir ä Duäll
und uff dr Stroos vor em Saluun
isch jetzt wirgglig ächt High Noon.

Do wirts bletzlig still – s duet in dr Ärde rumoore
will si z Glaihyynige immer no boore.
Uff dem gwagglige Boode macht ä Duäll doch kai Spass –
und das ischs dänn gsii mit „High Noon“ uf dr Gass.

Bsueche Si am Sunntig, 4. März, Zmidaag am fimfi
die erschti Zeedellääsete im Museum Glai Glingedal
am undere Rhywäg 26, dr Ytritt isch frey.